

Maitia: «Grenetek hobe du kontseiluari bozkaraztea, zurrumurruak zabaldu ordez»

Jospinek erabakia «herriko etxe gehienek iritzia ematean» hartuko duela dio

Hur Gorostiaga / Baiona

Jean Grenet Baionako auzapezari ihardetsirik, «zurrumurruak zabaldu ordez, Baionako herriko kontseiluari bozkaraztea hobe» lukeela azaldu dio EGUNKARIAri Frantxua Maitia euskal sozialisten idazkariak. «Ez da serioa hiri nagusi bateko auzapez bat zurrumurruak zabaltzen hastea. Ez luke kazetari txar baten lana egin behar», gehitu du Maitiak.

«GRENETEK gutun bat jaso ote du Jospinengandik, edo telefono elkarrizketa bat izan ote du Jospinekin? Ez da serioa hiri nagusiko bateko auzapez bat zurrumurruak zabaltzen hastea. Ez luke kazetari txar baten lana egin behar», dio Frantxua Maitia Izpurako auzapez, Akitania-ko eskualde kontseilari eta euskal sozialisten idazkariak.

EGUNKARIAK atzoko alean Jean Greneten hitzetan aitzi-natu zuenez, «Jospinen gobernuak Euskal Departamendua ez sortzea erabaki du, baina ez du aitortu nahi». Sozialisten euskal idazkariak, aldiz, garrantzia kendu nahi dio, nahiz eta Grenet gezurretan ari denik ez duen erraten. «Mementoko ez da inportanta Chirac, Jospin edo bertze edozeinek Euskal Departamenduari buruz erraten ahal duena. Momentu honetan, axola tipia dut



ARTXIBOKOA

Frantxua Maitia sozialistak Jean Grenet auzapezaren adierazpenen inguruan hitz egin zuen atzo.

zein arrapostu izanen den jakitea. Lehenik, gure galderari behar da aski indar eman. Hemen inportanta dena da herrien gehiengo bat ager dadin Euskal Departamenduaren alde, ondotik lehen ministroa gonbida dezagun. Horretarako, Baionak zer pentsatzen duen erran behar du. Gehiengoa ukanik, momentu horretan lehen ministroak gure gomita kontuan hartu ala zakarrontzira botako duen ikusiko dugu», azaldu du.

«Grenet ez dadila arduratuguk zer egingen dugun eta erran dezala Baionak zer dio-

en afera horretaz, alde den ala ez», aldarrikatu du berriz ere. «Grenetek egiten zaion galderari erantzun diezaiola, bertzerik asmatu gabe. Mementoko galdera da, ea zer pentsatzen duten udal kontseiluek. Izpura, Ziburu, Hendaia eta besteren erantzuna ukan dugu. Eta Baiona? Erantzun dezala, eta gero ikusiko dugu zer erantzuten duen lehen ministroak. Gehiengoa alde agertzen bada, lehen ministroari idatziko diogu erranez zein den Iparraldeko egituren sentimendua. Segurrenik, gomita egingen diegu lehen ministro

eta Barne ministroari Ipar Euskal Herriko Udalen Biltzarrera jin daitezen, beren erantzuna eman dezaten beren arrapostuaren emateko», gehitu du. «Udalen Biltzarrak erabaki zuen auzapezek 1996 urtean egin zuten bezala, orain udal kontseiluei galdera egin dadin. Gisa horretan plaketa bat egin ondoren, orain super-iritzi bilketa bat egiten ari gara udal kontseiluen iritzia jakiteko. Bururaino joan behar dugu eta 120 herriko etxe agertzen badira alde, 90 baino hobeki izanen da», esan du hautetsi baxenafartarrak.

Delizagarai: «Ez dugu ezkorrak izan behar»

■ RENAUD Delizagaraik, Jean Greneten taldeko udal kontseilari eta Euskal Departamenduaren bultzatzaile nagusietarikoak, «ezkorra izateko arrazoirik» ez dagoela adierazi zigun atzo, Greneten adierazpenei buruz. «Momentuz Jospinek Madrilen errandakoak bakarrik ditugu eta bertan ez zuen deus zehatzik erran» dio Delizagarai Greneten kontseilariak.

Hala ere Lionel Jospinek Euskal Departamendua Madrileko presioagatik ez sortzea erabaki balu «oso larria» litzatekeela dio Euskal Departamenduaren Aldeko Hautesien Elkarteko (AED) idazkariak. «Ez da posible erratea Frantziako egitura administratiboa ez duela aldatuko beste Estatu baten eraginagatik, eta une berean erratea ez duela aldatuko, beste Estatu horren eragina onarturik» gehitu du.

«Inoiz baino gehiago ageri da ahal bezain bat hautetsi agertu behar dela euskal departamenduaren alde. Hemengo hautetsiek beren nahia agertu behar diote Jospini» aldarrikatu du, Nicole Pery Gobernuako kide den Estatu idazkariak zentzu horretan lan egin dezan galdegiteko. Baionako udal kontseiluan boza antolatzeari buruz, auzapez lapurtarrak ezezkoa agertu ondoren, berriz, «itxaropena galtzen ez» duela esan digu.

UPNk PPrekin Madrilen negoziatu zuena «adar jotzea» izan zela dio PSNk

■ Nafarroako IUren iritziz, «fartsa, pantomima eta sainetea» izan zen

Asier Azpilikueta / Iruñea

JUAN JOSE LIZARBE PSNko burua alderdi horrek bake prozesuaren inguruan atera zuen agiria aurkeztera joan zitzaion atzo Nafarroako Gobernuako lehendakariari. Horren ostean, herenegun UPNk PPrekin Madrilen negoziatu zuenari buruz aritu zen. Nafarroako lehendakariaren hautaketa sistema automatikoaren erreformaren inguruan eztabaidatzen aritu ziren UPN eta PP. «Adar jotzea izan zen atzo Madrilen gerta-

tu zena. Batek zeozer aldatu nahi ez duenean, nahiz eta negoziazio prozesuari ekin, ez du aldatuko. Gainera, negoziazio mahaiko bi aldeak alde bera badira, alde aurretik jakin daiteke zein izanen den emaitza». «Ekainaren 13a igaro eta gero egitea espero dugu», diote UPNkoek.

Lizarberen aburuz, «nafarrekar garbi izan behar dute egungo Gobernuak ez duela sistema automatikoa aldatu nahi, komeni zaiolako UPNri eta PPri». Egungo sistemaren arabera, bigarren bozketan

inolako hautagairik ez badu gehiengoa lortzen, automatikoki botu gehien jaso dituen zerrendaburua bihurtzen da lehendakari. PSN eta CDN, garai ezberdinetan egon izan da UPNrekin gai honen inguruan eztabaidatzen. «Guk eta CDNkoek UPNrekin akordatu genuenean gai honen inguruan, ez zuen borondaterik kontu hau zuzentzeko. Elektoraliki ez baitzaie komeni». Lizarberen ustez beharrezkoa da hautaketa sistemaren aldatzea baina ekaina pasa arte itxaron beharko da.



MIKEL UHARTE

PSNko Juan Jose Lizarbe eta UPNko Miguel Sanz atzo eginiko bileran.

Nafarroako IUko koordinadore Felix Tabernak hautaketa sistemaren balizko erreformaren inguruan hitz egin zuen atzo ere. Atzo UPNk

Madrilen eginikoa «fartsa, pantomima eta sainetea» zela erran zuen Tabernak. IUren ustez, UPNk ziria sartu die hiritarrei gai honekin.